

建德縣志

9

建德縣志卷九

職官志

勤政

愛民

升遷表

州府附

周禮設官各有專司非徒耗國家廉俸而已縣之令丞少尉代有更變苟非其人圖稱爲難由孫吳迄宋宰茲土者以孫統沈瑀房琯最著自宋建隆三年以朝臣爲知縣而其責益重雖鼎革之際或以屠沽濫竽而七品郎官上應列宿職之所關自鉅也志職官

勤政

在官皆政也學官中有無曠厥職者亦列之

齊沈瑀字伯瑜吳興武康人南朝永泰元年爲建德令教民一丁種十五株桑四株柿及梨栗之屬女丁半之頃之成林民咸感悅

唐房琯字次律河南人開元二十二年拜監察御史坐鞠獄非是貶睦州司戶叅軍復爲令所至止德化興長利以治最顯寶應二年召拜刑部尙書贈太尉

宋潛說友寶祐五年以從政郎來知縣事時賦輸不均催驅爲難潛任是邦約供上之所出均田賦之所入一毫不求多於民民至今

賴之而宰亦藉是多滿去

(自序經界圖籍云)紹興經界距淳熙未久圖籍已多散失且嘗詔漕臣督州縣

補葺之則自淳熙至今日其弊又可知已豪右詭名規避姦胥舞文變易賦額銷蝕豈惟嚴陵哉寶祐戊午版曹始用舊額徵諸郡

太守告院謝公諗於衆曰有土此有財固也泛以舊額責之縣則產去稅存者其奚堪母已則按經界之舊而修明之乎亟聞於上

玉音俞之說友學製附庸奉行唯謹不期月而九鄉二十一都各以其籍來上迺視鄉分廣狹計物力多寡裁其溢而覈其虧因其

輕而革其重不底於均不止於是舊額無損新征頓輕義役成規藉以息民詞科買均配藉以應上命宿奸老蠹旣爲之風灑雪滌

而數十年來之苦於白輸者脫然如沉疴去體聖君賢太守之賜不其大哉既成父老請以等則鋟諸梓俾勿壞用畧叙其梗概朱文公曰三十年一番經畧方好至哉言乎潤澤而推廣之尙有望於來者

元馬彥禎汴梁人至正間任教諭時羣雄兢起三江以上無弦誦聲彥禎勤於誨迪鐸音特振因亂無所歸遂與兄子均助隸籍居焉明顧執中鎮江人洪武六年來任縣事施設有方籍人戶丁田之數分爲數等量事之輕重難易務得其平十夫一小牌百夫一大牌以櫃盛之遇有發遣則量數給牌役畢則收牌置之別櫃以備稽攷周而復始民無徭役不均之嘆

俞汝爲字毅夫華亭人由進士爲壽昌令有異政改建德令時值清丈編僉肩事繁重至則百廢俱興潔白禔身慈祥惠下新饗序

廸正學籍改造縣門剏修縣橋大培風氣民勒石頌焉

蔡茂春麻城人天啟壬戌進士隆慶中蒞任興學育才勸農積穀歷官三載利興弊革胥畏民懷累遷福州知府家居後流寇張獻忠犯麻城死之今祀名宦

吳洪昌宜興人由進士知縣事治崇簡略不尚繁文雖以世族貴介而謙抑性成尤振興文教當崇禎丙子鄉試場期令樂伶於學宮元聲閣鼓吹連日爲諸生兆又建思補軒以培地脈築西湖隄以興水利時稱賢令焉

清劉環字賜玉湖廣人由進士任隴西知縣謫建邑丞才大性剛不爲物撓抵任甫匝月奉委至四明督造戰船備嘗艱苦令甚敬憚

之代隣邑篆克著循聲尋復陞涇縣知縣

項一經字韋菴漢陽人由進士授金華府推官奉令裁改令吾縣
自萬曆中郝公定冊後歷年既久民戶田畝數增額外賠累者無
從稽考黠胥得以恣行飛灑時值編審特行歸號法令民照號收
田額有絲毫不符悉行改正從前溢數由是悉除創建龍山書院
修葺學宮課士勸農慤慤不懈辛亥荒疫煮粥賑饑施藥療病存
活甚衆繼丁耿逆之擾大兵往來一切軍需悉力經營督撫交薦
擢吏部考功主事戊午典試浙闈再過建德士民擁觀稱慶

謝仁澍字韻梧陝西安康人同治癸酉拔貢光緒十五年正月來
知縣事甫下車卽以造士爲先務寶賢書院田租經久疲玩諸生

膏火不給謝設法振刷擇老成紳士董之院課皆手加點竄數日
一臨諄諄以究心經籍勗諸生遇爭訟判決如流案無留牘蒞任
年餘興利除弊號稱廉明以縣志曠修六十餘年力爲籌欸設局
惜事未竣而卒

愛民

官所以牧民也能愛民即不負厥職學官能愛士者同其束身自愛無裨地方者不列

宋梅堯臣字聖俞宣城人學士詢從子也工爲詩初未爲人所知以
詢蔭爲河南主簿錢惟演留守西京爲忘年交引與酬唱歐陽修
與爲詩文自以爲不及繇是知名皇祐間由德興移知縣事賢士
多從之游善談笑與物無忤視民如家人子弟秩滿遷襄城令大
臣屢薦宜在館閣召試賜進士出身爲國子監直講累遷尙書都

官員外郎預修唐書

劉清之字子澄臨江人登紹興二十七年進士第調袁州宜春縣主簿未上丁父憂服除改本縣主簿請於州俾民自實其戶由是賦役平爭訟息

趙與檣宗室子家信安咸淳元年以奉議郎來知縣事二年民以旱澇告遂請於朝得粟一萬斛以濟三年陞通判建德府卽解任以所積俸錢併通判廳辦備堂從物錢預爲建德人戶代輸咸淳

四年茶租錢

司農少卿黃宗仁救荒記略咸淳二年丙寅夏水易陵谷未幾而旱方數千里凡建民所仰之地率自救

弗瞻顆粒無從至明年春乃擣烏味採蕪菁至又屑山木之膚以爲食形鵠載塗令尹趙公與檣戚戚不遑寧處曰民饑乃爾發廩乎曰無招商乎曰無勸分乎曰無幾束手矣幸先是朝廷科糶豐儲倉米於郡乃捐俸回糴二百斛率鄉都裒助以濟疾苦矜獨之

不聊生者又曰濟有限也則貸楮爲之祈哀請命乞糶於朝忱辭
感動廟堂惻然興憫乃撥豐儲米一萬斛優其直以賑之暨至曲
防諄戒無勺合不粒飢民之腹迄事而麥已秋田里翕然舉手加
額曰恩哉尹之生我民也異乎彼之因其有者矣鄉之任事者有
黃君炳文謀於衆時同被委者徐夢得李子奇喻子勳何權何自
敬何一之蔣開張大明唐景堯許汝弼方蘭孫許萬鍾洪榮祖洪
友龍劉光祖倪在鈞邵大中徐安國馮應得錢東陳
大林周文中陳化龍葉英發洪奎英凡二十有六人

明侯康遠弋陽人宣德三年任縣事新邑治興學校推誠撫字甚有
惠政在任九年民生樂業時稱賢令云

向正湖廣人正德間蒞任當王浩八之亂督府鎮守司道並集府
城供億調度悉有條理民得安乂

陳嘉猷廣東番禺人嘉靖九年以淳安教諭陞任寬以愛民勤以
聽訟自朝至夕不肯少懈所謂以民心爲己心處官事如家事者

尋遷嘉興府通判

潘絲字朝言婺源人嘉靖中由分水令移攝縣事蠲歲徵八百有奇刊爲額有瞽貧令子售基地於姪子死訟奪之絲知其奸而念其瞽也好謂曰姪誠爾負券業已成矣我以俸金爲若直瞽輸情自服曰寧死忍欺明府耶其服人心如此

郝光輔廣西馬平人萬曆間由孝廉知縣事禁差徭革火耗甄拔寒士解衣授餐殆無虛日時遇丈量履畝清釐魚鱗號冊皆其手定嗣有爭經界者必以郝公冊爲據臺使交薦會以憂去士民至今思之祀名宦

陶奭齡會稽人夙有文名萬曆間來司教鐸啟迪多方諸生贊儀

力却不受凡貧而無資者召致門下飲食之嘉惠士林人皆稱道
魏弘政承天府人以孝廉出知縣事清白自矢每朔望申明鄉約
緩征薄罰并立社倉以救荒夏則煮粥冬則市綿施棺掩骼固圉
空虛經旬不聞敲扑聲縣人呼爲魏佛

(縣紳鄧美政社倉記)夫食以基信富以維庶宣尼一

再言之即管大夫亦曰倉廩實而知禮節是故知民之天者可以
葆民可以豎國然則儲倉足食厥功豈淺哉雖然以上食下何如
以下食下以下食下者民勸也上食下者勸民互勸也今秉篆而
民悉自賑也以下食下者民勸也上食下者勸民互勸也今秉篆而
精心行者孰如吾魏大夫以豫章甲族掇巍科南楚霈河潤
於吾邑諸嫩治戶各尸而稷矣如思補軒之丹攄一梯雲閣之
指遍多士乞言問道廉善搜奸詎易碑之於口乃瞻焉環顧謂和
豐公庾宋都故趾卽東南西北各都圖預備總之上食下者先是
蓉江楊守倣古社倉勸民出穀給以冠帶區額有差頃蘭谷呂守
亦詣各縣發帑積粟歉則平糶民咸賴之然猶寄名預備幽遠孱
民疲於告賑西江之水能活幾何侯乃與包父母宋父母俞父母
商之獨厝趾陬陲戴星入出諭各鄉社是處輸粟或藏民家或置

約堂或貯廢院古刹而籍其數仍於里保中推選殷實端方者主
之轉虞耗藪透竇散陳易新豐入歎出息取一二歲積奇零令各
圖自相賑貸倫所謂以上食下以下食下不費之惠非耶夫食稱
民天而惠尙有孚太上因之伯佐業且諳是第其與以爲取以爲
治寶則與吾聖人食信富教差不侔耳要之因民利民惠我大德
勿問之矣侯之精勤心均平治於斯覩一斑哉昔隋長孫平宋朱
元晦義社兩舉侯較進焉按嘉靖初南畿飢甚侍郎席書言古荒
政可行惟作粥一法起脊頗速而世咸云不便蓋但知集於城隅
不計散於村野翻致殍殣於長途斃於道蹂故耳誰知侯不貸之圃
不涸之源也哉吾邑山田有限產穀頗稀生齒無窮食穀且盡豐
年尙需告糴凶歲何以療飢惟以常平之厥預待不時之需青黃
未接增值少許以償朽腐旱潦偶值平平價出借以恤飢饉村鎮隨
地轉輸衙市不致混冒民信可基富庶足保善行聖言孰踰吾魏
大夫不佞辱侯勸相之日躬聆德音心鐫已久縣諸紳人士及邑
庠文學應祝王生士奇王生立中張生時箴陳生自許方生有待
邵生應蒼王生率衆耆里徐守正許成秀陳子佐胡廷詮等誌侯
盛德並載各當道俞侯批文則有若都察院劉所云該縣捐俸易
粟單騎勸輸旣省搬運更杜假冒愈見畱心民瘼也者則有若巡
撫御史李所云邑原疲瘠民甚孱窳山民令益勸也者則有若視鹽
奇真循吏哉其以獎借之意遍喻山民令益勸也者則有若視鹽

御史胡所云該縣實心實政具在口碑一聞社倉之條首爲倡督之舉所稱一路福星不虛也者則有若巡視海道兼理邊儲右參議僉憲王所云該縣捐俸倡勸爭相樂輸貧民可恃無恐學倉並建更見加意青衿且藉社倉以爲講約之所教養兼備士庶咸休厥功不朽也者此並宜列左匪贅若夫葺學置庾固另有石侯弘政號敏菴以乙卯年蒞建今其日蓋三霜云

王國材崇禎四年任縣學教諭至則興學宮求免兩學丁銀禁報

鄉飲耆民以省累費且軫念寒士時多振恤一時稱賢師焉

（縣紳柴挺）

然記云今上御極之四年雲間達翁來建庠日也下車之始即雅意作人銳志更新適逢邑大父母楊雲翁臭味相洽號稱莫逆顧瞻學宮相與無然太息曰是不乃神聖所俎豆而妥侑者乎今若此其若諸人士之朝夕涵濡何於是各捐祿入若干金以鼎新厥宮而師復出己資增造衙齋屋宇不踰月而先師殿而明倫堂而齋廡而門樓言言噲噲各如績因出諸祭器細加整飭而簠簋籩豆之屬靡不犁然俱備功既竣日集諸青衿立社課藝人思矜奮擇儒童之優者爲會會定期有餉人爲評隲未幾而督學使至聯翩而歌采芹者悉師所甄拔士也且軫念寒士時多賑恤貧儒修雉之儀一切謝却不受會逢同寅徐師旅櫬無歸師爲之麥捐

百斛車脫一驂高誼薄雲士爭噴噴稱之至若求免兩學丁銀以
培士氣禁報鄉飲耆民以省累費邑人士耳而目之者指不勝屈
夫孰非作新一念悉心殫力而圖者哉諸人士樂觀厥成議勒石
以志不忘過余屬爲之記余惟語有之前事不忘後事之師也令
師之功德可忘是先聖諸儒皆可忘耳諸士誠藉是修德治業其
中行有坊表言有壇坫吐之爲朱丹堊碧之文措之爲清廟明堂
之業是真能不忘師者寧直賢書桂籍嗣美前烈也
哉師名國材字達甫南直上海人舉順天辛西亞魁

仲聞韶嘉興人崇禎間以舉人署教諭學問淵博詞華英敏憫習
俗專攻時藝力崇古學程士課文以經史爲先一時人士宗之
余一鳳字孟威龍游舉人署教諭學問才品爲時白眉尤善於誘
掖人時學宮朽敝力爲修葺復建亭學左以培文峯尋陞任去
詹從沅江山人崇禎十四年任縣學訓導性坦易循循善誘無厲
容兼精岐黃術士子貧而病者常至其家親爲療治後卒於官士

論惜之

楊宗簡溧陽人崇禎十五年由進士蒞任縣事治尙寬厚政簡刑清越二載甲申有歸志士民數千挽袂號留不得後再至嚴城會諸父老弟子歡若家人

清鄭應皋字允生無錫人順治五年由進士簡令建德時值燹後田廬荒廢商賈不通斗米銀五錢物價過倍又防兵初設強住民屋皋至力請之郡守析城東隅爲營房由是兵民安所重建學宮課文育士一時文教復興秩滿遷戶部主事

錢繼煜定海人順治十一年任縣學訓導性和而介不喜紛華尤軫恤寒士當春秋丁祭胙不數頒捐俸益之或至典衣士子傳頌

焉

羅曜斗江南歙人順治十八年由明經授本縣丞秉質敦樸與物無忤有雀角者善言勸諭不事苛求人以長者稱之秩滿陞灤城知縣再陞德州知州

嵇爾勳字以謙德清人順治辛卯舉人康熙初蒞任時學宮傾圮同邑令醵金修葺煥然復舊訓文以先正爲法與人終日言亶亶不倦獨居一室中吟唔之聲不絕郡守梁浩然甚優禮焉卒於官士林惜之

夏景松字子和盛京人年少英敏康熙十三年蒞任適耿逆抗命大兵絡繹不絕鄉市騷擾景松單騎偵察有犯者卽撻之善催科

凡遇比卯先期清算完者免赴經年不扑甲長一人胥吏無所逞其需索在任五年擢監察御史

李用勤字蒼岫由舉人爲本縣教諭康熙十六年任平易誠愷有古君子風執業問藝者細心剖晰善誘不倦遇貧窶諸生捐俸以給其薪水用勤爲縉雲望族兩司寇恭愨貞肅之裔然謙抑善下絕口不侈家世性喜咏吟有誰亭稿客星吟行世卒於官

徐京哲宜興人

府志作安義人

由蔭生授縣令清正平和愛民如子尋以

憂去士民欲歛賻不許因各具一簋焚香送行合郡咸集觀者如堵復肖像祀之

據廷祐河南人由進士知縣事政尙清簡書吏有愬貧者則曰再